



~ 16
3298
5



冊八拾
號九文
函九

門 八16
號 3298
港 5



帶經堂集目錄

第二編

漁洋續詩集

卷一

辛亥京集詩六十二首

卷二

壬子京集蜀道集詩七十三首

卷三

壬子蜀道集詩七十一首

卷四

壬子蜀道集詩七十二首

卷五

壬子蜀道集詩七十九首

卷六

壬子蜀道集詩九十三首

卷七

甲寅小祥後詩一十八首

卷八

乙卯家集京集詩八十一首

卷九

丙辰京集詩七十八首

卷十

丁巳京集詩八十九首

卷十一

戊午京集詩七十五首

卷十二

己未京集詩一百三十首

卷十三

庚申京集詩一百三十二首

卷十四

辛酉京集詩八十首

卷十五

壬戌京集詩八十六首

卷十六

癸亥京集詩六十六首

原序五

漢儒說詩分四家各有師傅不可易申培公倡於魯張唐褚氏之徒傳其學轅固生倡於齊翼匡師伏之徒傳其學燕人韓嬰推詩人之意作內外傳名韓詩傳之者為王食長孫諸人皆立博士至大官徒眾甚盛趙人毛萇傳詩為毛詩未得立唯貫長卿解延年徐敖諸人轉相教授至謝曼卿始為之序馬融為之傳鄭元為之箋而毛詩之名得並著之四家者各守其師之說歷久不易雖未必盡合於聖人之旨其意與文之著非苟焉而已甚矣

詩之學豈可以無傳與自蘇李變三百創五言而漢魏興六朝衰而有唐諸賢振起之五代降而兩宋之體變而肆其間非常特出之才不過三數人爲一時之倡後之人亦遂各傳其學相雄長雖不必若四家者之師承而各以其才之近性之悅刻意倣效不啻高曾學之既成自爲一宗睥睨騷雅凡以得所傳故也苟無傳焉則亦猶之不學而已雖有作焉得爲作乎國子祭酒濟南王先生產聖人之鄉傳申轅之學爲齊魯詩宗卓矣海內名卿賢士號爲工詩者無不折衷於先生得一言之當

則羣目之曰此濟南公所許度其詩必大異於是執卷而造者無虛日先生亦樂爲磨礪以大其學之傳初先生官揚州懋麟猶童子也偶以七字見知竊聞所以爲詩之學幸不謬於古人而爲教之辱今二十餘年矣先生方以學行遭遇 聖明拔之館閣爲天下師而海內言詩者又皆輻輳於門即如申轅諸公立博士盛徒衆未爲不可輒閉關簾閣非素所遊好不肯接日與懋麟輩數人講論自娛輯辛亥以後所爲詩若干篇爲漁洋續集命序承命愧陳筆不得下者累月先生詩豈懋麟所得

序然先生之學既竊嘗聞之矣知先生之學而謂不知先生之詩當在所棄而今之名詩人者往往詬懋麟之學謂與先生異則當在所棄必矣顧不棄而且假之言豈先生所以學與懋麟之所竊聞他人不必知而有自知者與先生之詩具在其鑿刻而藻績之者極萬物變幻之巧而出之以自然所謂非常特出之才得古人之傳自為一宗者也他日過齊魯之間必有起而傳先生之學如馬鄭者流為之箋傳海內乃得共聞先生之學不才如懋麟亦得竊附於曼卿之列則世之見詬者

百載後更何如也則是先生之力較杜氏尤難而功亦偉矣先生遭際昌時受

聖天子曠代之知自郎署改官侍從尋拜國子祭酒可謂榮遇矣然先生之詩不係乎官位也三光岳瀆之氣傳之萬古而常新此後學之幸而先生無與焉讀予文者其亦以為善言德行也夫康熙二十年歲次辛酉臘月江陰受業門人曹禾謹序

原序四

新城王先生詩為當世宗海內士無不誦習漁洋山人集者前集始丙申迄己酉合二十二卷刻於吳郡流傳徧天下矣門人輩又取其辛亥以來之作釐為十六卷名曰續集復將刻於金陵予學詩於先生久不禁喟焉歎興以為風雅之統系至今日而有歸也自明之中葉倡為俗學羣焉以摹擬剽竊為工後生寡昧奉為科條傲然自號曰我詩人也所學者唐詩也嗟夫唐之詩固如是乎哉詩之教垂於聖人聖人定為經以治後世之性情使

歸於正騷人之詞漢魏之作斑斑也陵遲極於梁陳少陵杜氏起而振之所謂上薄風雅下該沈宋盡古今之體勢兼人人之獨專其集成之聖與夫陳隋之際詩道中衰藉無杜氏則詩人忠厚之意與作者比興之旨皆汨沒而不彰前無所承後無可述聖人之教或幾乎熄矣杜氏之功不在刪詩正樂之下其儼然紹風雅之統無惑也昌黎韓氏擴而為怪奇譎詭眉山蘇氏變而為汪洋恣肆唯陳言之務去而師古人之意統緒相承未之或異也唐宋之詩人多矣獨三家者為大宗而杜氏之

功甚偉先生去眉山遠當淫詞冒義流學守株之後毅然任摧陷廓清之責遠承正始力排偽體求古人於千百載以前距之近代分其源流條貫涵泓蓄蘊久而大會其心然後發於詞觀者駭其言若河漢之無極也宣於口學者得其旨若昭昭揭日月而行也蓋自來作者皆受成於先生而風雅之統復聚於今日然而難矣自騷漢以逮元明前乎三家者有定論而可尋矣後乎此者離散分晰莫或是正也則取專家之書窮年盡氣一一而求其離合其力不易詩者天地之元音發而不窮故

其境常新易曰擬議以成其變化貴其常新也俗學不知擬議安知變化保殘守缺挾恐見破之私意如越人之鬚瞽者之鑑非唯無用從而仇之紛紛籍籍詆曰學宋不知先生之學非一代之學先生之詩非一代之詩其學何所不貫其詩亦何所不有彼蚍蜉之撼大樹亦笑其不自量而已矣然自先生出而聞風興起與親承指授者莫不開拓襟懷思與古作者為徒其間如韓之於杜孟郊張籍盧仝之於韓六君子之於蘇異才輩出不可勝數先生起衰救敝之功施於當世已若此不知千

或亦可以少息與康熙壬戌夏月江都受業門人
汪懋麟謹序

原序六

今國子祭酒新城王先生海內詩名三十年矣其所爲詩得於性始天末地表經事史通揮斥含負無所不到士之以詩投先生者一篇之善一句之佳一字之工未嘗不循環吟玩言於人至以爲不可及長洲老書生金居敬晚乃遊先生之門而先生亦以爲可與言詩也一日語居敬曰漁洋續藁十六卷始辛亥迄癸亥凡若干首向者刻於吳下子爲我以一言敘作者之意居敬辭不敏先生曰第言之昔者居敬聞之先生也世有相沿之論曰

詩當爲唐詩又當爲大歷以前詩人之詩夫唐之文章至元和而極盛其詩之傳者雋異瑰瑋非其人未有能爲之者也謂元和以後之詩可廢也抑固矣凡名爲爲唐詩者必詆訶宋詩而訾毀西江尤甚斥之爲山魃木怪著薜蘿之體實則西江之音節句法皆本於唐其原委不可誣也蓋有宋詩家自歐陽文忠公王文公推揚李杜以振楊劉之衰弱而靡聲曼響中於習尚未能遽移至黃魯直而後有以窺三唐之窾奧力追古之作者而與子瞻蘇氏抗行於一時其後學者派分爲二所謂各

得其性之所近云爾其一倡一和於彼於此之變之正或離或合有不知其所以然而然者論者顧弗之深考與且夫唐人之高致其不在公家之言審矣而擬之議之者竊竊焉享其敝帚何哉學宋人詩而從其支流餘裔未能追其祖之所自出以悟其以俗爲雅以舊爲新之妙理則亦未得爲宋詩之哲嗣也此先生他日之言也後世之士讀先生之詩者由是以究極其作詩之旨將必有以知其廣大變通而非拘於一隅之見也包羅貫穿而非主於一家之說也此居敬所以述而志之也先

生曰是推往者而大暢厥辭也可與言詩已康熙二十三年歲次甲子四月長洲受業門人金居敬謹序

原序三

新城王先生擬刻其近詩屬嘉淑爲之序已而不果子序亦佚去先生又徵責予予不敏竊嘗見先生與宣城施先生論詩矣宣城持守甚嚴操繩尺以衡量千載不欲少有假借先生則推而廣之以爲姬姜不必同貌芝蘭不必同臭尺寸之瑕不足以疵類白璧兩先生疑若矛盾乃其披襟扣擊簡牒往復商略評次往往各當於意乃止此倡彼和丹鉛錯互欣然並解若水乳合何也先生曰吾別裁不敢過隘然吾自運未嘗恣於無範故其爲詩

波瀾愈闊格律愈精變化愈極其致今操觚之家好言少陵者以先生為原本拾遺言二謝王韋者又以為康樂宣城右丞左司其欲為昌黎長慶及有宋諸家者則又以為退之樂天坡谷復出而先生之詩其為先生者自在也元氏之序浣花也以為詩家之總萃蓋讀文房長吉義山之集無不辨香杜陵然後知元氏之非夸也泛湘川者望衡九面廬阜之山分形異狀見之者固然漁洋蜀道諸集固已見於天下矣先生束髮登朝浮沉郎署迴翔二十年而後典石渠白虎之司列侍從清華之

選不讀先生近詩或未足以盡先生之大也若夫宣城力砥其汎濫新城宏獎其品流易曰同歸而殊塗百慮而一致通人之致未之或殊焉是說也子欲質之宣城先生及梅子耦長耦長都官之後人先生嘗欲作四子論詩圖謂愚山耦長其一則予也至若左太沖詩文不僅三都士安正得一序耳先生竟梓其詩而不錄予序者予真有厚幸矣
鹽官陸嘉淑撰

原序二

新城王阮亭先生刻漁洋山人續集成序之曰詩自三百篇以降漢魏六朝辭則贍矣而韻或未舒至於唐古風近體兼作聲文相宣不差圭黍而杜子美極風雅之正變千彙萬狀兼古今而有之其後韓退之去陳言為硬語時則有若孟郊盧仝李賀劉義馬異為之輔白樂天趨平易為奔放時則有若元稹楊巨源劉夢得為之朋李義山變新聲為繁縟時則有若溫庭筠段成式為之和非不欲決子美之藩籬別成一家言然卒莫能出其範圍

特具體焉而已余嘗合

胡孝轅所輯全唐

詩而裛益之審其正變竊以為詩人之能事備焉
近之說詩者厭唐人之格律每欲以宋為歸孰知
宋以詩名者不過學唐人而有得焉者也宋之詩
渾涵茫茫莫若蘇陸合杜與韓而暢其旨者子瞻
也合杜與白而伸其辭者務觀也初未嘗離唐人
而別有所師然則言詩於唐猶樂舞之有韶武而
絺繡之有黼黻也今乃挾楊廷秀鄭德源俚俗之
體欲盡變唐音之正母亦變而不能成方者與先
生弱冠成進士遂以詩名海內受知 天子特擢

翰林宏獎風流振興古學京輦士大夫言詩者以
先生為正宗先生之於詩擇一字焉必精出一辭
焉必潔雖持論廣大兼取南北宋元明諸家之詩
而選練矜慎仍墨守唐人之聲格或乃因先生持
論遂疑先生續集降心下師宋人此未知先生之
詩者也記曰治世之音安以樂張子曰詩之情性
溫厚平易今以崎嶇求之以艱難索之則其心先
陋隘矣讀先生之詩有溫厚平易之樂而無崎嶇
艱難之苦非治世之音能爾乎崑山徐乾學撰

原序七

吾師宮詹學士新城王公次其辛亥以後詩十有
 六卷曰漁洋山人續稿其門下士刻之吳中將成
 公以示言而命之序言惟公之於詩既已寢息乎
 三唐兩宋之間而較轆六朝追蹤漢魏矣二十年
 來漁洋山人一集士之好稱詩者莫不家有其書
 言何人更敢以言先之然嘗聞之宋潛溪曰詩非
 易易也必天賦超逸之才加以稽古之勤良師友
 琢磨之切而朝吟夕課以驗其淺深登山臨水以
 博其情趣五美云備然後可以言詩今觀於公寧

有一之或缺乎公天姿秀拔一切鬼瑣解果之習不以屑於懷自幼承家庭之傳其於諸經百家言窮日夜鑽研之雖飢渴之於飲食無以易也所居琅琊渤海之鄉所遊北而燕趙南而吳楚之地猶以爲未極乎周覽則西沂黃河登二華縱目於劍閣雲棧之險歷蜀都夔門浮江漢而下焉其經行之處必與魁人傑士班荆贈縞以上下其議論其間能詩之家若今左都御史陳公說巖吏部侍郎李公容齋翰林編修汪公鈍菴及故禮部尚書葉公訥菴四川按察使宋公荔裳翰林侍讀施公愚

山其尤著者蓋公自釋褐且三十年於茲其吟咏之功遠思冥索未嘗以旦夕間而後能致此篇什之多也雖然今日貴人何限其爲負絕異之姿矜博洽之富者寧不可與公等比而縱情飲博流連於親朋之座者去其半溺志榮膺馳逐於槐柳之列者又去其半方寸幾何其精神旣有所注則思路發揮之處自不能遠出於人此理勢之必然者自公掌太學三四年來言見其趨朝入署之外未嘗出邸門一步捉鼻鼓膝時唯作嗚嗚聲無論一輩徵逐之事非其所好即廷推屢及而得與不得

亦皆漠然聽之是公之刊落聲華律已於寧靜實有貫五美而爲之根柢者宜乎拔起流俗卓然成其爲一家之詩也然則士苟不以寧靜自處即使五美略具猶未足盡詩之能事况一無所操而欲與公並驅風雅庸有當乎言質本疎庸又處海濱廣斥之區無可以激發其志氣少雖學文於梨洲先生而未究其業輒棄之北遊以公藝林宗匠幸獲灑掃其門而黽勉公事之餘日唯嚙手以給食不暇從公竟學詩之願因讀公詩集俯仰今昔尤滋愧焉康熙甲子十月鄞受業門人萬言謹序

原序一

今學者以馳騫聲詩爲立言輒自矜其不朽蓋比戶然矣苟悅乎衆而未能超然有出乎人君子不尚也懷戶牖之見者難與言域外之觀被布帛之服者未可論雲霞之衣詩文亦猶是也齊魯之詩近代稱邊廷實馮琢菴諸公而王元美獨推李于鱗當時諸子皆若莫與爭雄後人齟齬濟南然拔其最者峨眉天半要非妄語新城王阮亭先生論詩於其鄉不尸祝于鱗於唐人亦不踵襲子美其詩舉體遙雋興寄超逸殆得三唐之秀而上溯

於晉魏苟採於齊梁者予嘗於比部宋牧仲座上見其清思獨絕共歎以為非塵中人又延接衆流喜事獎借單詞之善輒嗟詠不輟口康熙戊午春天子聞其才召見懋勤殿特改翰林院侍講尋拜國子祭酒流風滋廣談藝家羣奉月旦於新城矣客或有謂其祧唐而祖宋者予曰不然阮亭蓋疾夫膚附唐人者了無生氣故間有取於子瞻而其所為蜀道諸詩非宋調也詩有仙氣者太白而下唯子瞻有之其體製正不相襲學五經左國秦漢者始能為唐宋八家學三百篇漢魏八代者始

能為三唐學三唐而能自豎立者始可讀宋元未易為拘墟尠見者道也阮亭詩刻有漁洋山人集若干卷入在禁院時上嘗徵其詩錄進三百餘篇謂之御覽集未敢專行又彙為漁洋續集憶辛亥夏與阮亭暱就輦下相約互為論敘忽忽十餘年不暇作自慙固陋無足齒數而阮亭論詩嘗謬許有南施北宋之目北宋者謂荔裳也予謝不敏頃盡取子詩點定一過又仿唐人主客圖摘予五字詩藏諸篋笥予感而序之以見吾兩人之論詩往復如此阮亭賦才通敏興會奔屬昔嘗自揚

州泝大江一日抵燕子磯乘風鼓柁作懷人詩六十首誦之泠泠然今二十年所篇什益繁其繼此而為漁洋集者浩乎不知其所止矣宛陵施閏章撰

帶經堂集卷二十三

歙門人程哲校編

新城王士正貽上

漁洋續詩一 辛亥稿

寄汪茗文兼懷梁曰緝二首

迢遙秣陵樹繾綣淮南酌何意獻王宮對面成離

索田園在東吳夙志甘邱壑遙夜夢尋君吳江楓

葉落 庚戌冬予入都茗文子告南歸相遇河間道上

汪子去勾吳梁生返陽夏重來京洛地半是悠悠者吾家汶陽田近在徂徠下他年拂衣去好共匡

山社

送朱錫鬯之廣陵二首

常記黃公舊酒壚
玉山傾倒索人扶
不須惆悵思吳詠
還有當時酒態無

帕首弓刀出塞遊
桑乾飲馬斷冰流
江城三月花如霰
却聽鶯啼憶代州

送趙子

懸壺寂寞磨盾忽
飛揚一劍通輕俠
單車覽大荒
秋風吹隴阪
戰地指河湟
西北天垂盡
安危在護羌

愚山至都門同荔裳顧菴繹堂洎溱小集家

兄西樵邸舍同用初字

爾駕琴高赤鯉魚
偶來京洛慰離居
樽前兄弟狂猶昔
袖裏詩篇錦不如
斜日竹梧新霽後
明燈池館夜涼初
幾年南北相思切
今夕論文一起予

送劉生赴甘肅二首

江南春正好
此別草萋萋
到日涼州曲
秋風雜鼓鼙
鰲河源來大夏雨
雪度安西夢裏吳
淞水鄉書醉嬾題

羨君書記好結束
去翩翩路轉湟
中粟人耕磧裏
田飛書摧党項
憑軾射蠻羶
未羨通侯貴
移封近

酒泉

題施愚山少參賣船詩後

國家急廉吏將以風百寮如何十年來吏道紛吳
敖哀哉此下民鞭扑分安逃魯山與陽城斯人竟
難招江西飽亂離白骨填蓬蒿石田廢不治遺黎
雜山魍一二老寡妻熒熒困征徭昔者數守令為
政嚴風飈峻令盛誅求細不遺齷齪金玉競輦致
樂哉共宣驕憲府前上壽鞠脰一何勞公堂侮下
民意氣一何豪寡妻哭向天血淚埋荒郊亂後幾
子遺乃以資汝曹是時宛陵公持節吉臨交為政

貴簡易潔已先清脩放衙苔蘚淨飛鳥營其巢賦
詩彈子嶺慷慨同石壕白鹿與青牛斯道誰鼓橐
公獨奮百世臯比陳唐堯廉恥存綱維義利窮毫
毛蘭芷變荆棘孔鸞革鷁汝曹即不仁寧終肆
闕虢七載一舸歸無物充官艘兩郡萬黔首留公
但號咷讀公賣船詩中心何怵怵填膺抒此詞庶
以備風謠他年韋丹碑會見留江臯翹首望宇中
煙火尚蕭條安得百施公為時激頑澆

又賦賣船詩二首

畫舫青簾外蕭江水自波彈琴山月上捲幔野鷗

過白帽還初服青溪穩釣蓑何須乘赤鯉踪跡五湖多

小築陵陽曲桃花潭水清故山雲木好隨意摘船行招隱詩空就浮家計未成秋風捲茅屋安穩卧柴荆

題梁錢唐柳村漁樂圖四首

糝徑楊花覆白蘋閑吟漁具送殘春平生只愛天隨子老向江湖号散人
春雨如塵不放晴柳陰深罨釣車鳴神鴉飛去早潮急昨夜魚苗新水生

公子風流韋杜如雕橋莊畔輞川居持梁躍馬非渠事自辦牂柯學釣魚

最憶漁家銅斗歌澄湖鱗甲晚生波畫圖忽起滄洲興奈此黃塵烏帽何

宋荔裳觀察招同諸公集大司馬王公別墅

分賦四首

任拙逢迎懶耽幽野興長招邀盡朋舊脫略恕清狂斜景穿深竹高雲過草堂京華騎馬地何意得滄浪

稍稍風翻葉瀟瀟雨散萍江湖歸瀕洞霑灑入空

冥官燭盃同把緇塵鬢各星明當攬朝爽巖窻萬
重青

更愛銀槎古如澠恣拍浮窮源過大夏鑿空孔音取

通侯往事傳千載雄談隘九州自憐轅下者局趣

老驂行酒銀槎元朱碧山所製

雨急燈還亂更闌柝向沉相憐湖海氣未廢短長

吟牕濕爐熏細花扶屐齒深重來河朔飲消息到

秋砧

題黃頊傳冊

文章滿腹不知貧誰信錢刀解致身他日漢廷卡

御史何如草屨牧羊人

甲鳥盟得子

寄信聰山叟傳經好自娛人倫宗有道天意慰商

瞿夙世應金粟他年似老夫袞師何足匹早見識

之無

天壇齋宿同家兄考功作

穹宇中宵啓齋心上日虔星河明泰時燎火動甘

泉紫禁傳清漏青松覆御煙竹宮空望拜不數

漢皇年

和汪樊桐虞部

孝陵于役詩二首

十載遺弓劔銀池即鼎湖地形圍御宿雲氣滿蒼
梧原廟青山合松楸白日孤當年侍臣在沾灑向
春蕪

地是周原舊人知漢道昌千秋傳畢郢萬戶衛咸
陽流水環宮寢春花上繚牆下陵一回首王氣鬱
蒼蒼

陳子萬至得其年往河南消息

自爾辭梁苑蕭條秋氣繁幾時兄弟別何處故人
恩斜日銅駝陌花飛金谷園有情望今古流歎上

東門

大宗伯龔公招同荔裳愚山顧菴繹堂湟濤

西樵伯紫鐵夫穀梁集黑龍潭分得下字

謝公癖登臨南宮富清暇城南曠瞻矚招尋共休
夏長鬚來叩門柴車已巾駕數折緣陂塘宛如涉
元灞初晴道少人涼風吹襪綬靈宮氣蒼鬱藤蔓
纏古瓦蕭蕭見郊原稍稍登臺榭百斛好螺黛明
白若圖畫目極西山雲心馳東林社夕陽下龍湫
布席俯川汜水聲空谷裏人影疎林下藻密魚飛
疾樹深鳥鳴沙叶眼中有數公詞壇各雄伯稱詩

互掎角論文競教吳叶劇飲捩觥船起舞杖竿蔗
 辟彼太白高爭挽大黃射不知四座中誰啖牛心
 炙賤子性寡諧入世苦聾牙叶牀頭有周易避人
 時枕藉諸公張吾軍左次願三舍百年去堂堂為歡
 幾良夜詎愁街鼓動更解青絲筓露下星斗繁流
 連不知罷

題陶季登岱詩後

前年曾出使南到奉高城五嶽尊東帝諸峰逼太
 清徂徠殊秀拔梁甫亦崢嶸愛汝新詩好深予採
 藥情

題張魏公墨蹟後

淮西白骨接符離三十年中幾喪師太息長城石
 自壞軍中空卓曲端旗

送李武曾赴黔南幕府

都護新開府昆明舊拓邊百蠻知漢大五尺憶秦
 年書記風流最參軍露布傳壯遊真萬里不用慕
 張騫

和榮洞門水部山行覽古之作

疊嶂臨渝塞清秋望灞原西風動禾黍白露下陵
 園羨道金鳧出空林宿鳥喧雍門昔有歎寂寶竟

何言

吳歷修竹吾廬圖爲汪季角舍人題

讀書茅簷下樂於奉朝請
礪邊清淺流屋後檀藥
影借問輞川人何如斤竹嶺

聞陳伯璣病

爾卜雲卿宅頻年狎釣徒
城頭出西嶺窓裏見東
湖原憲貧非病文園渴未蘇
如何彭蠡鴈書札一行無

王筠侶草蟲爲大司寇梁公題二首

鬚翁任誕如忠恕脫屣朱門傲
五侯肯爲尚書寫

幽興碧花紅穗草堂秋

一幅丹青顧野王草根纖意曲籬
旁風懷磊落如公少便注蟲魚也未妨

題周雪客小像二絕句

昨來秋水軒中坐共讀蒙莊秋水篇
愛爾胸情似秋水日臨秋水弄潺湲

齊梁子弟矜人地胡粉搔頭只弄姿
何似周郎好年少六朝松下獨吟時

紀事

期門朝警蹕羽衛肅森沈一代朝
陵典千官望

關心周廬青嶂繞馳道 翠華臨東北陵園路

關山雨雪深

奉常煙客先生八十初度寄呈兼寄端士異

公懌民虹友藻儒諸兄弟四首

相業婁江大孫謀奕葉賢居傳通德里史紀定陵
年耆舊人還在蒼茫歲屢遷西田高卧處指點說
平泉

夙世謬詞客前身應畫師居然輞川隱高詠石丞
詩縑素千金直雲煙萬象隨清齋還繡佛此意少
人知

問訊東園菊吳山日夕佳祗耽彭澤飲莫問太常
齋邱壑自孤往春秋多好懷平生吳祭酒晚歲共
荆柴

家世青箱學先生絳縣身五君光祿詠九老洛陽
人銅狄看朝暮熊經有屈伸扁舟未東下吟望只
逡巡

送秦留仙太史歸梁溪

我鼓湘靈瑟君彈昭氏琴房櫳激流徵太息感知
音古塞鴻聲遠離堂燭淚深臨觴忽不御為爾一
沉吟

題吳歷畫二首

清秋野鴈無人態多在黃蘆紅蓼間驚起數行沙
際去寒潮漠漠一舟還
蟹舍漁灣入杳冥遠山都似佛頭青橙黃橘綠紛
秋色好買輪鈎下洞庭

送愚山遊嵩山

夙昔山水懷夢想嵩陽寺先生江海人蕭條自孤
寄寒潭漸收潦華林起涼吹落日下輾轉青山帶
行騎褰衣涉清潁羣峰亂蒼翠二室秋崢嶸三花
未顛顛却尋盧鴻宅巖扉饒古意窈窕玉女壘投
壺或一至煙中眺龍門伊洛宛相次古人去已遠
山川見標致安得方外遊從君共題字

送愚山遊嵩少再賦

祖道青門秋氣深川原風葉亂寒砧嵩雲洛日遙
相憶魏闕江湖共此心八節灘高晴亦雨三花樹
古畫長陰陵陽歸去名僧社却聽微鐘憶少林

送程崑崙赴耀州

妙高臺上月迴首十年餘憂患人間世浮沈別後
書華原看露冕漆水度征車赤縣雄三輔聲名盡
不如

聞林茂之先生已葬鍾山

萬古鍾山下今成有道阡龍蟠高士宅狸首故人
憐老尚歌朱鳥魂應拜杜鵑何時磨鏡具一間秣
陵船

送張簞山學士歸廬陵二首

海內人知諫獵名伏蒲今復記 乾清一時對仗
丹心苦幾夕憂時白髮生天下文章唯永叔廬陵
人物有邦衡曲江風度他年憶金鑑還應蒼聖明
迴首觚稜別紫宸孤舟遙下富川濱誰令江外漁
樵侶爭識 先皇侍從臣上殿似聞辛慶忌行吟

休擬楚靈均千秋公議存青史應為朝廷惜此人

送陶季之曲陽

五岳奠方位望秩各有常巍巍太乙宮作鎮趙代
疆古帝昔時巡遺跡留朔方何來漢使節乃在上
曲陽飛石事矯誣廟壇誰能詳 先皇定郊祀藉
古追虞唐特釐名嶽祭昂畢垂光芒夫子通古今
有如網在綱告我曲陽行班馬鳴河梁西出橫門
道為君酌重觴作詩具掌故筆力苦不強到目藉
往蹟報我託篇章笑彼公玉帶誕謾圖明堂

程湟溱席上同荔裳愚山顧菴繹堂西樵送

蔡竹濤之太原兼寄潘次耕

今日復高會河朔正三伏是時積雨收深泥沒車
 輻舉頭見西山彈冠罷新沐入門一笑粲脫略無
 拘束濯濯蔡騎曹清姿映冰玉胸中萬卷書縱橫
 破邊幅能為青白眼未屑朱丹轂長揖出井陘慷
 慨弔頗牧邯鄲竟為秦妖夢起偏聚太原天下險
 興廢幾反覆至今百戰場亂雲如杼軸潘生好年
 少健筆驚老宿懷古發高吟秋天兩鴻鵠西望鴈
 門山離思亂心曲行矣盡餘觴馬足已翹陸

十四夜月懷愚山兼呈家兄及荔裳顧菴繹

堂隍溱時愚山遊嵩洛

昨共西園宴追隨盡上賓如何今夕月獨憶洛陽
 人清淺明河轉參差列宿陳心知同此夜含意欲
 誰申

中秋夜同西樵先生作寄禮吉子側兩兄

永夜金波轉徘徊桂樹旁關山在何許河漢不勝
 長紉扇停空篋清砧散早霜故園今夜月應解照
 流黃

十六夜懷荔裳顧菴容齋說巖

未覺清輝減還看玉鏡浮光應連北闕人憶在南

樓寒沼芙蓉淨微霜蟋蟀秋素琴如可薦聊爲緩
離憂

送薰樵歸成山兼寄宋澄嵐先生林寺孝廉
漢家祠日主遺跡成山中吾子千秋意棲遲滄海
東涼天朝放鶴雪塢夜聞鐘問訊河汾叟東歸道
未窮

九月十五夜哭師兒三首

滴盡眼中血驕兒聞不聞他鄉風雨夜寂寞一孤
墳

猶是中秋月清光依舊圓却將萬行淚送汝白車

泉

寒食棠梨道紙錢高下飛夜臺音信斷兒去幾時
歸

宋荔裳梁園飲集送姜鐵夫自覃懷歸會稽
塞鴈紛南度送君歸去來菰蒲寒潦減風日水亭
開軹里多遊俠江東出霸才醉餘深感激野水注
金盃

答李武曾過武陵見夢之作

來詩云一片猿聲花底
出仙郎曾否夢中關

君過武陵道獨往桃花源不見秦人處青谿空夜
猿離情逐花水幽夢渡湘沅何日漁舟去雲中雞

三十四
犬喧

送孫古喞赴南靖

萬里無諸國孤帆直向東盤餐登馬甲并邑枕鮫
宮禁舶人煙少懸針職貢同孫郎還嫵媚真有紫
驄風

卷二十三

滄經堂集卷二十四

歙門人程哲校編

新城王士正貽上

漁洋續詩二 壬子稿

初春四日休沐同荔裳方山西樵往西山道

中作

遙山鴈齒列遠水魚鱗波朝朝國西門馬上呈嗟
峨却掃閉簾閣幽夢紛陂陀坐羨雲間禽歸飛向
巖阿上春寡人事勝侶時來過望山馬注坂投林
鳥驚羅行行近磊砢清暉一何多豈識絕塞山娟
靜如媯娥禽夏如可期違復知其他

香山寺月夜

明月出東嶺諸峰方悄然殘雪尚在地掩映西齋
前竹色既閑靜松陰媚淪漣清暉一相照萬象皆
澄鮮此時憩寂者宵分猶未眠

由磴道上洪光寺二首

磴道入雲端曲折松陰裏秋雨寂無人空山落松
子

絕壑霾雲雪唯逢麋鹿羣雲中時梵放下界不相
聞

觀祕魔崖至龍潭作

山行逐蕪若徑轉無人迹亭午踰高嶺逍遙隨所
適古寺披荒榛乍到如有獲盧師晏坐處猶存澗
邊石石上留孤松終古不盈尺地僻山鬼鄰鳥下
蒼苔積孤閣臨寒溪林壑莽蕭蕭槭灌木紛相糾陰
崖互崩坼何當秋雨時驚湍若潮汐來此十日眠
濯足蛟龍宅

盧師山

盧師昔日經行地惆悵蒼崖古木風最憶深秋飛
瀑下四山寒葉亂流中

晚望翠微寺

澗西翠微寺迢迢翠微裏蒼茫採樵路似有微鐘
起山風冷吹煙斜日亂溪水紛紛飛鳥還行人去
何已

登石景山浮圖絕頂眺望

浮圖茲山頂峻嶒插孤標千盤歷詰曲直上凌風
颼寒空稍明淨百里見纖毫茫茫塞上山浩洶連
波濤渾河盪山來石壁如動搖咫尺居庸關鳥道
迴青霄上谷接雲中設險非一朝 聖代亭障空
丸泥罷函穀關門開落日士馬無矜驕迴身望漁
陽城關何杳杳薊邱植汶篁遺烈思燕昭望諸與
騎劫智勇皆蓬蒿朔吹揚驚沙屯雲盤怒鵬慷慨
一傷懷覽古心鬱陶逝將御冷風揮手辭塵囂

皇姑寺

皇姑寺前人日晴畏吾村畔草痕生山桃堤柳自
春色粥鼓鐘魚非世情鐵券南宮憐將相黃沙北
狩誤公卿獨慙扣馬輸巾幗天市星文幾夜明

碧雲寺

入寺聞山雨羣峰方夕陽流泉自成響林壑坐生
涼竹覆春前雪花寒劫外香湯休何處是空望碧
雲長

魏忠賢葬衣冠墓宏麗甚慨然有作

恭顯坐中書能死前將軍赤伏盡鈞黨禍始誅李
雲讀史長太息閔彼漢運屯我來西山遊極目多
邱墳何人穿復土雙闕高嶙峋天祿與辟邪夾道
紛錯陳大書復深刻似欲驕千春冢中玉蟾蜍變
化亦有神豈知窮竒骨不得安窳窳石與五鹿
彈指隨颺塵嗟哉陽司隸毅魄為青燐狐貉同一
邱無事勞沾巾松風催落日泥飲當干巡西望咸
陽原石馬嘶荆榛

卧佛寺

清晨越南磻畢景來東林石徑入幽闥稍聞鐘磬
音禪房鴨脚古別院杪攤陰春夕月復佳微雲滅
遥岑山氣自蓊鬱天宇亦森沉道人澹相對松風
灑衣襟夙懷清淨退因識妙明心寂寥無可說請
君張玉琴

晚入退谷却寄孫北海先生

退谷遠煙暝水石起寒色西溪有歸人東峰隱餘
日積雪封巉巖微徑雪中出殘冰流復斷暗泉聽
還失不知荒寒中前峰去安極稍見磴鯁牛悵望
歸飛翼侍郎昔掛冠於此散愁疾畫壁滄洲圖

有故友陳

路若畫壁結屋雲林側溪南萬竿竹歲久漸蒙密為述淨名意更就支公室慙歎解巾非何年此棲息

赤松亭

春寒雪厚氣冥冥只有孤松隔岸青欲看谿山最佳處更攜僧上赤松亭

退谷見朱錫鬯李武曾潘次耕蔡竹濤題名

時朱在廣陵李在黔南潘蔡在太原

故人消息比何如萬里江湖歲又除山寺到來先一笑春風石壁見君書

曉起至五華寺尋水盡頭作

退翁亭子蒼崖前五華古寺當其巔殘僧夜雪煨

芋火童子開門尋澗泉石壁空青散雲錦金沙照

曜浮清漣他時把酒蘿陰下風墮巖花烏帽偏

故明景帝廢陵懷古

金山南臨裂帛湖荒陵十里鶴鷗呼奪門事往二

百載行人過此猶歛歔紅牆剝盡古瓦落莓苔瀉

雨生銅鋪老松離立色枯槁但穴蟲蟻餘根株敢

塗龍輜禮本殺矧乃劫火經樵蘇咫尺天壽雲氣

接抔土獨葬西山隅洪宣老臣稍凋喪國成一旦

歸刑餘勃鞞之問史所貶詎有宦寺干征誅黃沙

三十七
漁洋雜言卷二
慘澹鼓聲死萬乘一擲成纍俘國有君矣社稷重
孫申謀鄭無差殊白登城南翠華返錢塘司馬功
難誣紛紛南渡議和戰乃知計左非良圖全寅之
占信竒中朝衣東市嗟何辜劍南歸來西內閉唐
家父子輸廢奴處人骨肉事非易子臧季札今則
無功罪千秋有特筆九鼎一髮須人扶謚同泉鳩
理太酷紀年猶幸無革除裁令流水良亦足寧論
玉匣還珠襦欲落不落夕陽下弔古且復留斯須
殘碑滅沒牛礪角石攬橫卧蒼髯鬚君臣一代盡
宿草雍門太息當何如

玉泉

蕭晨金山下濯纓玉泉水十畝清瑤流分明鏡相
似金膏時掩映碧玉相傾委水荇隨風翻靡靡映
清泚垂楊夾碕岸其下多芳芷流為裂帛湖宛若
昆明裏湖上多漁村網罟集沙尾宣宗昔遊幸龍
舸茲山趾當年功德寺荒涼嘯山鬼何況芙蓉殿
遺跡皆銷毀碧水自東流彌傷人代駛儻逐五湖
舟去問鴟夷子

裂帛湖雜詠六首

裂帛湖光碧玉環人家終日映潺湲分明一幅蔡

侯紙寫出湖南千萬山

淋池十里芰荷風太液西來一派通應有恩波下
黃鵠年年流入建章宮

水軒面面似船牕沙燕鷓鴣盡作雙忽憶夢迴聞
柁鼓一枝柔艣破煙江

宣宗玉殿空山裏簫鼓樓船事已非何似茂陵汾
水上秋風南鴈淚沾衣

石甕山頭歸片雲望湖亭上倚斜曛紙錢社酒棠
梨道誰到湖邊耶律墳

萬樹垂楊掃綠苔桃花深映槿籬開遊人盡說西
堤好須及清明上巳來

雨夜懷荔裳

官燭冥濛夕懷君池上樓元言誰共宿青嶂想同
遊今夜山中雨應添春澗流那能畏沾濕遙思屬
林邱

贈謝方山舍人二首

歷落嶽嶠可笑人朝衫猶自染京塵深憐謝客吟
詩好莫訝王郎斫地頻三月鶯花連下杜廿年車
庫感平津青絲挈酒高粱水取次東風解襍辰
舍人簾閣晝凝香下直清齋似太常昨日同尋煙

際寺題詩多在贊公房晴溪冰雪寒逾好風磴莓
苔滑不妨騎馬城南春又暮幾迴西笑憶滄浪

清明大佛寺送張素存編修遊西山

好事張公子皎然瓊樹枝遙憐寒食過不負碧山
期白社陶家酒紅泉謝監詩芳春不同賞怱悵對
華滋

懷嚴蓀友往廣泉寺因寄留仙

不識廣泉寺泉源有路通羨君成獨往深夜伴支
公澗水聲聞寂林花色相空九峰歸去客微尚想
能同

過金魚池懷愚山因以寄荅

昔君振遙策獨往嵩山中還歸陵陽下高詠北樓
風舊榭宛苔迹清池銷蕙叢聊憑一書札緘意向
飛鴻

計甫草至得茗文展成既庭書

芳序竟荏苒別離年歲多綠陰散林樾首夏氣清
和懷人罷琴酌思往屬流波還欣松陵子步屨一
來過

葉子吉編修入都見示新詩

愛爾狂歌客真成託聖朝誰從辨哀樂祇擬近風

二〇八七
漁洋續詩卷二
八
騷銅狄看朝暮金莖久寂寥 孝陵弓劍地松栢
日蕭蕭

雨中懷彭駿孫因示訥菴

夏雨忽芊眠流雲度高閣簾幙數禽鳴綠陰一花
落相思武原子遠寄彭湖作文酒昔歡娛別離今
寂寞年時易晚晚壯歲風驚穉何當一樽酒共對
成斟酌

七月一日出都感寄西樵先生

驅馬自茲去浮雲燕趙閒因風向巴蜀西上幾時
還骨肉存亡淚時哭兒江山離別顏射堂今夜雨蕭
颯鬢毛斑

寄內

何必言愁始欲愁離騷端只是離憂兩年再墮童
烏淚萬里虛爲諭蜀遊落日深山聞杜宇秋風古
驛下金牛傷心欲寫蠻牋寄十樣空傳出益州

定興道中感懷寄繹堂湘北子端周量千仞

匪莪季角頌嘉諸子

吳霜點鬢上千鬚消盡文通賦別才愛子魂應憐
栢實愁人淚已化瓊瑰天連劍外山無數棧轉褒
中水自哀都是此行悵悵地使星休羨益州來

保定懷古

蛾賊西來日還趨上谷城國殤誰效死上相本專
征夜送中軍欵天留別駕名更聞真御史止水至
今清別駕邵公宗元
御史金公毓峒

定州懷古三首

公子曾聞雅善詩倉唐一對使人悲翻憐往日申
生死不解晨風與黍離
一代詩豪劉夢得元和標格冠當時欲尋陋室知
何處斜日空城徧兔葵
三守江湖鬢欲星太行了了送餘青嶠嶠海外歸

來晚無復絲絢侍禁庭

題新樂縣驛壁寄荔裳

當年霧夕詠芙蓉促席傳觴樂未疎名忝應劉七
才子座傾沈范兩尚書龔芝麓梁蒼
巖二宗伯飛星過漢無留
影萍葉隨潮少定居猶有前期不相負秋來同釣

錦江魚

真定寄鄭次公水部

神女樓高望杳冥恒陽縹緲亂峰青百年河北蟠
三鎮千里行山入五陁太行八陁
井陘第五玉帳巖關征戍地
垂楊殘照短長亭極知水部能懷古莫遣中山酒

易醒

七夕宿獲鹿縣話別感成

無數青山繞縣門
秋河斜處已黃昏
來朝又向并州路
雙淚憑君寄故園

雨中度故關

危棧飛流萬仞山
戍樓遙指暮雲間
西風忽送瀟瀟雨
滿路槐花出故關

井陘關歌

迴星城邊落日黃
西來氣欲無太行
栢巖雙壁稍
狡獪目成已覺心清涼
天公一夜送寒雨
千疊

疊雲錦張丹崖翠壁窮萬狀
瑰奇娟妙難具詳
綠蘿蕭蕭罨巾角
石瀨颯颯漸平聲衣裳
峰迴徑絕不

知數谿訝倏見開中央
戍樓旌竿滿雲直
橫亘長城環巨防
冠山子城瞰窮漠
噴壑巨瀑聞雷礮
登樓顧盼豁胸臆
四山雲氣爭飛揚
蛟龍鬱律起眼

底散為霖雨
周八荒
關南石勢更奇怪
亦如突奧連堂皇
懸車束馬那可度
行人緣棧如秋秧
幽并

澤潞此天險
飛鳥欲過愁翱翔
聖代即今罷烽燧
空餘畫角吹嚴霜
乃知地利未足恃
此關幾閱諸

侯王

故關寄訥菴二首

憶昨將遺白團扇秋雲隴首句爭傳分攜幾日逢
秋社忍逐西風便棄捐
冒雨看山拂帽裙丹崖翠壁故紛紛只愁葉四無
由見一首新詩特寄聞

胡桃園夜雨

日暮炊煙起驛樓虛堂楚簟怯新秋溪聲一夜兼
寒雨縱使啼烏也白頭

青玉峽

路繞井陘東奇峰看不窮眼明秋峽裏復此碧玲瓏

瓏

平定湧雲樓故趾

金趙尚書
秉文建

湧雲樓閣上城邊猶記尚書創建年青嶂人煙連
玉峽綠蕞花雨映桃川金源文獻誰遺老楊趙風
流果大賢更憶左司詩律好移家曾費買山錢

翼州人與趙齊名
元左司遺山居此

七月初九夜宿平定州夢兒渾忍涕成詩

一從死別淚潺湲夢裏牽衣未解顏千里太行谿
谷黑汝魂何路識榆關

壽陽驛題韓文公詩後

原詳續詩本

天寶昔喪亂，宰干及阿鞞。扇禍始漁陽，流毒被河朔。辛苦九門戰，堂堂李與郭。滋蔓逮三鎮，世守恣兇虐。軍中立留後，諸藩擅官爵。山東勁兵處，縣官實自弱。元和聖天子，咨相授方略。淮蔡洎淄青，次第就東縛。移兵壓山東，勢如掃秋蘗。遺恨功未成，殺機生魏博。庭湊何么麼，跳梁敢弗恪。偉哉昌黎公，談笑狎巨鯨。我行過壽陽，遺詩緬猶昨。韓愈殊可惜，朝廷乃大錯。真卿與巢父，茲事詎堪數。誰與秉國成，蛾眉竟謠詠。杜牧有罪言，千秋實良藥。

觀射

太行北麓坡陀高，孟秋七月風蕭騷。我行百折沿汾桃，空山十丈飛怒濤。馬首城南得平臯，小試射耦分朋曹。并州健兒頭虎毛，仰天大笑開弓發。黃間一發鳥獸號，草間狐兔紛騰逃。書生手無大食刀，凌煙空羨鄂與褒。君不見越石清嘯不復作，眼中故壘今蓬蒿。

寄高念東先生二首

袁水交流谷口居，比鄰相餉盡樵漁。十年宰相如彈指，萬里通侯幾上書。世事卿還用，卿法歸來吾亦愛。吾廬當時柳市諸賓客，閱盡朱門半廢墟。

幾載松風夢乍酬飄然一杖悟浮休羣公未屑東
門候夫子真尋五岳遊絳雪丹砂隨處足黃雞白
髮不關愁蘭陵舊事休相擬欲駕飛鴻徧九州

初縣飲酒

種秫常思住醉鄉葡萄未肯博伊涼拍浮便可稱
名士潦倒真須號渴羌投老欲從田父飲開封聊
對馬軍嘗滑稽莫作鴟鵂笑無計忘憂只杜康

介山懷古

驅車綿上聚懷古綿上田授壁事已遠遺跡今虛
傳晉國昔多難公子實大賢五蛇為之輔一蛇獨

者乾身隱竟焉文狐趙羞比肩逃榮道固高報德
理亦然徘徊望忌坂落日無寒煙何人貪天功嗟
哉南內年

郭有道墓下作

太息桓靈季清流見此人西園方賣爵北寺幾纒
臣危行全鈎黨諸生學塾巾千秋徐孺子高義許
相鄰

冷泉關道中

南徑雀鼠谷崎嶇殊未休路隨千嶂轉峽束一川
流灘急長疑雨蟬嘶畏及秋雲峰將落日立馬迴

三六
海峽集卷三
含愁

霍太山

岳色清秋裏
峯巒俯素汾
幾時携蠟屐
絕頂息勞筋
姑射連冰雪
中條接白雲
竹書何日事
霸業久三分

國士橋

國士橋邊水
千年恨未窮
如聞柱厲叔
死報莒敖公

洪洞與劉子方

晚到揚侯國
涼風吹稻田
衣裳滴空翠
城郭入清

泉鴨唼荷邊
雨雞鳴竹外
煙故人能好
我早辦買山錢

寄宋荔裳觀察

平生名岳入
竒懷小住青城
亦復佳落拓
羞蒙子公力
低迷真學太常
齋蜀王樓畔
花如繡卓女
壚頭酒似淮
剩欲與君同
弔古宣華舊
苑拾遺釵

姑射山

驅車平水陽
遙望藐姑射
何處見飛龍
煙深日將夕

猗氏往蒲州道中有感

令狐城畔雨霏霏遙指中條積翠稀西接新秦三
輔迴東鄰故絳兩川圍空聞魏國山河美久識唐
家節度非愁絕無心更懷古清秋風景亦沾衣

望中條山

今朝美風日望見中條山青嶂有時隱白雲隨意
還泉飛幽谷裏鳥轉竹林間欲訪韓終去菖蒲駐
好顏

河中感懷寄諸兄

何處依依動客愁蒲津雲物迴高秋河聲近挾中
條雨關勢遙分太華旒人代茫茫雙去鳥夕陽渺
渺獨歸舟京華故國俱千里心折西風鶴雀樓

蒲州憶兒渾

無限秋風庾亮愁生存華屋死荒邱自憐異國題
詩處滿目山川上白樓

中條山下作

中條初日上嵐彩變朝昏芳樹重重塢流泉曲曲
村河流趨底柱山勢鎖關門借問王官谷貽溪跡
尚存

首陽山

峨峨首陽山迢迢屬雷首遙揖巨靈掌近對風陵

口蒼茫河上舟搖落關門柳一詠採薇歌昔人復何有

河上寄從兄山史

前年君往蘭谿道金華洞中拾瑤草傳來八詠似休文愛翫新詩愁絕倒華陰古道接宏農一望秦山深萬重遙看青壁孤雲起知在西南第幾峰

望見華山二首

蒲阪南來問釣船風陵埽上隔風煙黃河一曲流千里太華居然落眼前
仙掌浮空迴不羣明星王女望紛紛乘槎更極

南目咫尺三峰生白雲

帶經堂集卷二十四

滯經堂集卷二十五

歙門人程哲校編

新城王士正貽上

漁洋續詩三

壬子稿

潼關

潼津直上勢嵯峨
天險初從百二過
兩戒中分蟠太華
孤城北折走黃河
復隍幾見熊羆守
棄甲空傳犀兕多
漢闕唐陵盡禾黍
鴈門司馬恨如何

拜楊伯起墓道

悠悠關內路
驅馬桃林塞
歸鳥岳祠邊
長河遠天外
大鳥下潼亭
落羽今尚在
夕日薦蘋蘩
愁心逐

征旆

華陰道中

平田漠漠稻花香
白道清泉間綠楊
二十八潭天上落
無人知是帝臺漿

雨宿岳廟萬壽閣

松蛻龍鱗不記年
驚人老鶴起松顛
扶筇未到希夷峽
先對三峰一夜眠

望華山

關中八水匯清渭
獨朝宗黃河西北來
交會船司空河流
挾底柱岳勢分
農山河兩戒首氣壓殺

丞東金天正肅殺屹然白帝宮削成五千仞真宰散鴻濛及關見岌業元精羅心胸倏忽雲氣生西接終南峰諸峰忽已失俛首趨河潼峨峨司寇冠獨立青雲中蒼茫望三輔秋氣去安窮荒唐秦皇臘寂寞希夷蹤何當駕白鹿還共驂茅龍

華州道中

地古宏農郡雲峰去不窮
泉飛名岳雨稻熟野塘風
漕輓通河渭雄關界華嵩
唐家傳七世何事失山東

華州齊雲樓

唐昭宗望京處

齊雲樓上望京師渭水東流無盡時父老尚傳行
幸日教坊曾譜斷腸詞城空只見雙飛燕劫敗猶
爭一局棋莫問寒煙十六宅土花凝碧至今悲

遇仙橋即事

浮雲收渭北初日照終南馳道連秋水官橋度曉
驂人煙生浦樹鳥語入晴嵐欲訪漁川隱蘆中有

釣菴

漁川源華州山水勝處

渭南道中

秦川秋色迴四望極風煙樹隱金椎密花開玉井
鮮水光浮蓮音勺山翠入藍田往昔長安道孤城

近日邊

豐原

豐原高不極原上行人度秋晴渭川望遙見藍田
樹

金氏陂

金氏陂前弔稔侯麒麟高冢野花秋茂陵徐福書
空在驂乘還生爾許愁

渭南望瀑園寄南鼎甫僉憲

酒曲風煙好新秋望瀑園池通清渭水花暖紫蘭
村西蜀天邊節南宮雪夜樽十年鴻爪意愁絕詎

三六
漁洋續詩卷三
堪論

寄題華州西溪

月出少華頂寥寥天宇清孤雲收欲盡衆壑湛虛
明杜老昔游處西谿蘋葉生青松架壑秀白鳥逐
舟行誰持竹竿釣解此濯塵纓

驪山懷古八首

鸚鵡何年問上皇野棠風折繚垣長銷魂此日朝
元閣親試華清第二湯
路滿香塵拾隊鈿諸姨五隊夾城邊花開繡嶺看
調馬雪下離宮有賜

舞罷驚鴻歲月徂長門深閉長青蕪君王自愛霓
裳序不記樓東一斛珠

內殿傳呼菊部頭梨園弟子按梁州善才零落龜
年老渭水猶明羯鼓樓

蜀王音信渺天涯青鳥西飛日又斜斷粉殘香誰
得見承恩只有玉蓮花

鳳凰原下鹿槽旁號國夫人有賜莊無數青山學
眉黛當年誰入合歡堂

不復黃衫舞馬牀更無片段荔支筐祇餘今古青
山色留與詩人弔夕陽

三、五九
海內雜詩卷三
四
空城幾曲水潺潺松栢淒涼滿舊山輦道無人秋
草合年年嗚咽到人間

望終南山

青綺門邊路終南積翠陰山河三輔壯煙樹五陵
深朝市幾遷改白雲無古今何如歸輞口水石好
園林

新豐

寒煙漠漠新豐樹渭水東流西日暮粉榆舊社土
花平今古行人自來去

灞橋寄內二首

長樂坡前雨似塵少陵原上淚霑巾灞橋兩岸千
條柳送盡東西渡水人

太華終南萬里遙西來無處不魂銷閨中若問金
錢卜秋雨秋風過灞橋

銅人原

宮門漢月渭川波天本無情奈若何今日荒原逢
薊子愁將銅狄更摩挲

咸陽

故國臨中渭名山見九峻綠苔未央瓦黃土阿房
宮王霸成何事興亡自昔同蕭條北原上陵樹各

悲風

渭橋懷古

秦川夕澄霽
灃水明如練
西上中渭橋
颯然秋氣變
嬴政昔構造
作此象天漢
美人與鐘鼓
流連恣荒晏
徐市期不來
山鬼壁已獻
我昨驪山行
徘徊弔中羨
荆榛蔽銀海
樵牧羅金鴈
麒麟折其股
冷落青梧觀
後代復何王
繡嶺明珠殿
唯有終南山興亡幾回見

晚渡灃渭

清川生暝色
鼓楫溯中流
返照紅將斂
終南紫翠稠
遙看雲際寺
欲放漢陂舟
故國東溟上
茫茫清渭樓

望終南雲氣

終南雲物一千里
遠橫嶓冢包商顏
不雨不晴最窈窕
一東一西時往還
何日高樓尋紫閣
來朝驛騎繞黃山
無心羨汝能舒卷
慙負秋來水石閒

白雲一東一西一南一北

漢武帝通天臺

通天臺畔望咸京
秋入秦川雨半晴
御宿不來仙掌散
宮車已往露盤傾
袖光遙指虛無影
渭水長

流日夜聲此去西風茂陵路祗應腸斷沈初明

咸陽早發

日照長陵小市東依然蹤跡逐飛蓬未央宮闕悲
歌裏鄴杜鶯花淚眼中已見銅人辭漢月空留石
馬卧秋風多情最有咸陽草和雨和煙歲歲同

茂陵

武帝乘龍久上昇集靈臺古幾人登晴川森森通
槐里秋草萋萋入茂陵天馬歌成愁出塞泉鳩事
去涕霑膺誰知一代孫宏閣唯有東方諫獵能

馬嵬懷古二首

何處長生殿裏秋無情清渭日東流香魂不及黃
旛綽猶占驪山土一邱

巴山夜雨却歸秦金粟堆邊草不春一種傾城好
顏色茂陵終傍李夫人

飛龍務

此地臨汧渭秦嬴有舊封飛龍何日去凡馬至今
空落落驪駒氣蕭蕭苜蓿叢黃雲秋草裏悵望古
城東

望太白山却寄劉戶部介菴

猶並終南地初看太白高連峰停夏雪絕頂見秋

毫黑水行當近青門望轉勞渭流將客思百折去
滔滔

武功道中

武功回首望金城古跡蕭條感乍生
禿節尚憐蘇屬國黨人終賴竇遊平
白頭鬱鬱身前事青史悠悠世上名
千里終南山色好一枝筇竹萬緣輕

武功懷古

唐家慈聖寺后稷有郃封二水流沮漆
千秋擬沛豐高原山色裏小邑夕陽中
樂府康王好何時訪洪東

扶風道中

北望迴龍薄西行過馬嵬俠遊無柳市
史筆闕蘭臺老鬢愁中改秋風隴上催
田園情話好何事不歸來

馬伏波祠

冥冥炎海伏波祠肅肅靈旗故國思
萬里功名銅馬式五谿淫潦跼鳶時
隗囂詎識真王異朱勃終慙地下知
空憶平生少游語歸來歛段悔教遲

織錦巷

慧絕璇璣手當如棄置何憐他蘇蕙子
枉嫁竇連

波

鳳翔府

城邊汧渭兩交流隴蜀中分第一州西雍橫當斜
谷路南山高接杜陵秋雌鳴尚憶秦人霸星隕難
銷漢相愁形勢依然身萬里扶風歌罷拂吳鉤

和東坡開元寺憶子由韻

石剎在鳳翔府署

河潼西上千餘里五丈原邊望翠微地逼隴關寒
更早雨晴汧水雁初飛身經紫閣筇難到囊比朱
儒願已違夢裏倚箇雙白髮不歸真被鶴猿譏

鳳翔夢兒渾

夢裏荒雞下五更牽衣嗚咽話分明生兒曾慰王
懷祖早死誰憐馬客卿賸有枕痕和蠟淚已無腸
斷怯猿聲不因未悟彭殤理十七年來舐犢情

寶雞道中

時序颯已變征蓬何處休遠天吳岳影斜日渭川
流雲棧餘高鳥磻溪有釣鈎龍鍾三十九白盡老
夫頭

寶雞縣

險絕古陳倉停車落日黃霸圖今寂寞陳寶亦銷
亡城郭秋雲裏人家清渭旁迴看三輔遠秦樹但

蒼蒼

石鼓山

遙憶岐陽狩來過石鼓山韓蘇今地下星斗尚人
間谿谷歸飛少川原獵騎還寄情汧渭水千折過
潼關

益門鎮

天險當秦鳳提封界雍梁棧雲高不落隴樹曉還
蒼古堆催征騎秋風弔戰場山南明日路漸入武
都羌

宿觀音菴

盡日崎嶇躡白雲常明燈下息勞筋亂山斜月朦
朧裏一夜風雷瀑布聞

大散關

石壁橫千仞盤盤上翠微行人縈閣轉鸚鵡下山
飛戰壘空埋鏃巖關幾合圍雲車與風馬鬣歸夜
深歸

和尚原

納納乾坤大吾胡淹此留箐林連虎穴毒霧起龍
湫瀑急雷霆鬪天荒魑魅愁思因飛鳥背浩蕩返
齊州

煎茶坪

大壑沉雲霧冥冥萬仞梯孤峰分隴漢兩水劃東

西坪東水北流
西水南流遥直金牛峽旁臨白馬氏當年誰設險

不用一丸泥

自長橋至草涼樓

西下嘉陵水瀾瀾綠滿灘綠崖紅叱撥紫棧曲欄

杆九折行人少千峰落日寒不知投宿處樵響隔

雲端

鳳縣

險絕岐南路岌堯蜀北門千峰圍邸閣一線望中

輿論
原城下嘉陵水林間謝豹村衰遲慙鳳德愁向接

鳳嶺

南岐地何高鳳嶺踞其右路絕無鈎梯直上若懸

溜日月互蔽虧光明錯昏晝雲霧四蕩滴雷車中

雜糅飛龍何衙衙天矯出巖竇俯瞰兩當水奔流

下騰湊轉石類搏檝畫沙成篆籀初疑飢蛟蟠更

作外蛇鬪聞昔周文王盛德及靈囿鳳鳥此來集

世遠事悠謬末季重邊防戎馬幾馳驟秋風吹散

關一夕驚老瘦

寄家人

京洛分襟七夕前南岐驛路五更煙故園刀尺齊
紉素遠道風花蜀國絃斷續鸚飛深塢裏橫斜雁
度夕陽邊棧雲隴樹重重隔閨夢何由向左綿

棧道懷歸

棧雲千疊打包來兩鬢蕭條萬慮灰陵拓幾能開
口笑鴻蒙真擬掉頭迴駑牛駑馬從時好功狗功
人未易才夢裏故園漁釣穩金鵝飛處白蘋開

柴關嶺

早發陳倉道馬蹄亂雲霧行行到柴關雲低雨傾
注哀徑中槎牙幽篁四森布大石立當關勢如猛
虎踞世無飛將軍磨牙爾何怒蛟龍喜昵近氣奪
生憂懼怪鳥時一啼聞聲不知處黑江遠瀕洞萬
瀑齊奔赴頗聞紫栢山仙靈所遊寓石髓倘一逢
白日生毛羽誰使野鶴姿璩璋墮籠笈真宰不可
問更向蒼茫去

雨度柴關嶺

棧中新漲未歸槽百丈柴關水怒號鳥語不聞深
箒黑馬蹄直上亂雲高天垂洞壑蛟龍蟄秋老牙
鬚虎豹豪誰識熏香東省客戎衣斜壓赫連刀

南星雨發

驟雨南星道秋陰草木風澗寒傷馬骨雲亂失蠶
叢僭憶公孫帝危知大禹功中原何處所夢落散
關東

雨趨留壩

急雨下烏櫳千峰一線通路遙洋水北天盡武關
東峽偏風雷氣人穿虎豹叢誰知星使節今夜託
牛宮

畫眉關南渡野羊水

四山封窳篠一水急波瀾巨壑蛟潛穩飛流馬渡
難陰崖終古闕白日幾時看惡竹縱橫甚還須斫
萬竿

武關寄家書

驛騎千山裏平安兩字書高堂衰白早兒女死生

餘聽雨思兄弟臨風問起居白頭吟更苦莫負錦
江魚

馬鞍嶺

南下畫眉關遠色疊諸嶺黃緣百里間斷齧蔽光
景蹇嶮疲登降織路亦修整或仄如連軒或植如
負屏或如岐陽鼓或如宛胸鼎如鳥或跂翼如魚
或骨鯁殊狀紛角逐詭類爭一逞峭岸勢欲坳捷
足不遑騁二分垂在外趾壓後人頂飛瀑時界道
赴壑力逾猛人與水鬪爭心目各相警天意限雍
梁設險有斯境君子履忠信小人懷僥倖永念垂

堂言乘危更三省

宿馬道江上

江流太悲壯客夢自難安沔漢千山阻梁洋八月
寒羌兒稀聚落氏道賤衣冠漸達褒城驛遥遥度
七盤

觀音碓

本名閭王碓賈中丞改今名壁上
有宋嘉崇賦棧道平歌沈繹堂書

觀音碓險絕連山列天仗奔峭洶波濤大石蹴龍
象造物鬱磊砢及茲乃一放急瀑何砰訇盤石成
巨防渟為千丈湫潭潭不流宕怪物中屈蟠豈無
鎖紐壯儻燃牛渚犀窮此精靈狀頗聞賈中丞於

此鏐疊嶂故人推沈宋詩筆各雄長星宿森光芒
虬龍怒倔強解鞍苔石滑高歌一神王更須巨靈
手運斤出天匠鑿我郝閣銘敵彼小海唱

七盤嶺

七日行褒斜目瞶耳亦聾濁浪崩崖垠征衣碎蒙
茸不知天地濶詎測造化功岌然土囊口雞幘摩
蒼穹磴道上七盤大翻排天風絕頂忽開豁白日
當虛空褒水出谷流漢江繞其東巴山跨秦蜀蜿
蜒連上庸川原盡沃野天府如關中橘柚鬱成林
稻苗亦芄芄襄陽大編來千里帆檣通當年粵天
漢運歸隆準公將相得人傑驅策芟羣雄一戰收
三秦遂都咸陽宮智勇久淪沒山川自龍從跋馬
向褒國日落煙濛濛

閏七夕抵褒城縣

褒斜十日路白髮忽侵尋紅葉下江水始知秋氣
深馬驚初出谷城閉不聞砧何處天河影浮雲只
自陰

哭渾沂兩兒

閏七月初八夜
南鄭使院入夢

謝傅當年枉教兒西風江漢鬢成絲傷心寒食棠
梨雨兩地孤墳哭向誰

帶經堂集卷二十五

帶經堂集卷二十六

歙門人程哲校編

新城王士正貽上

漁洋續詩四 壬子稿

漢中府

路繞褒斜夢故園今朝風物似中原平蕪蹀躞連
錢馬近郭參差橘柚村萬疊雲峰趨廣漢千帆秋
水下襄樊只愁明日金牛路回首興元落照昏

漢臺

絳灌當時伍黥彭異代看竟成隆準帝不屑沐猴
冠磊落真王氣蒼茫大將壇風雲今寂寞江漢自

波瀾

故宮曲二首

濕螢幾點粘脩竹昏黃月映蒼煙綠金牀玉几不
歸來空唱人間可哀曲
往日朱門帝子家柴車一去即天涯平臺賓客今
何處零落小山叢桂花

漢中偶題排悶

漢川風土佳可憐復堪憶佳鱖持作羹黃柑耀金
色自我歷周秦見此邾莒食阿瞞非解人區區笑

雞肋

虛谷菴二首

菴有黃楊
二最奇

三寸黃柑水浸渠一林紅桂映棕櫚鈎簾恰對中
梁色正好高眠讀道書

太息黃楊樹子前琳宮幾歲飽風煙交柯接葉真
憐汝未似先生厄閏年

南鄭至沔縣道中雜詠二首

黑水梁州道停車問土風沔流天漢外嶓冢夕陽
東處處棕櫚綠村村穉穉紅更須參玉版脩竹賤

如蓬

漢川脩竹賤如
蓬坡公詩語

歲歲桃花水魚從丙穴來金盤飛素雪玉手潑新

酩茶戶雨中焙橘官霜後開山南風土美去住一徘徊

女郎廟

女郎山相傳是張魯女

朝過女郎道遙望女郎祠溪水疑環珮春山學黛眉千林丹橘熟一徑碧苔滋日暮神靈雨西風滿桂旗

沔縣謁諸葛忠武侯祠

天漢遙遙指劔關逢人先問定軍山惠陵草木冰霜裏丞相祠堂檜栢間八陣風雲通指顧一江波浪急潺湲遺民衢路還私祭不獨英雄血淚斑

武侯琴室

竹篠娟娟靜江流漠漠陰至今籌筆地猶見出師心遺恨成銜璧元聲有故琴千秋絃指外髣髴遇高深

定軍山諸葛公墓下作

高密起南陽文終從去聲高祖暴繫本見疑數仞亦非武堂堂諸葛公魚水託心膂二表匹謨訓一德追伊呂視操但如鬼畏蜀還如虎嗟彼巾幗徒與公豈儔伍紫色復蛙聲抵隙各為主火井方三炎赤伏更平聲典午志士恥帝秦祭器猶存魯陰平一

失險面縛忘奔莒知公抱遺憾龍卧成千古峨峨
定軍山悠悠沔陽許鬱鬱冬青林哀哀號杜宇耕
餘拾敗鏃月黑聞軍鼓譙侯寧足誅激昂淚如雨

大安驛

犖确三泉縣坡陀一徑開江流沮口合風雨沓中
來漢相經營地氏王駕馭才西窮嶓冢盡節使亦
雄哉

五丁峽

南窮石牛道崑崙下雲棧三日招我魂足躡目猶
眩豈知東蒼州耳目益竒變始過金牛驛穆囑已

凌亂漾水從北來劣足泛鳧雁舉頭嶓冢山峨冠
倚天半大哉神禹功從此導江漢漸入五丁峽譎
詭駭聞見斗壁何獰狰十萬磨大劔攢羅列交戟
茫昧通一線亂水殷峽中鮫蜃喜瀾汗仰眺絕圭
景俯聆競雷拊九鼎鑄神姦到此百憂患東方牧
犢兒竟使蠹叢判我行忽萬里風土異鄉縣身落
大荒西終賴皇天眷咄咄復何言艱虞一身賤

雨度五丁峽

徼外蕃王國荒荒巨峽侵龍居三洞秘熊館四時
陰笮馬何年度金牛此路深五丁虛斧鑿愁絕畏

登臨

懷朱人遠

憶汝西來日江山發興奇戎州千日飲夔府百篇
詩湘水蘅蘭浦巫山雲雨祠金牛寒峽裏北望苦
相思

寧羌州

威遲辭北闕浩蕩賦西征天險金牛峽悲歌猛虎
行岷峨連雨氣汚漢走江聲三戶遺民少蕭條見
廢城

寧羌夜雨

不信無晴日曾聞有漏天武都連夜雨巴子幾人
船山入氏中亂寒臨熨道偏荒城聞鼓角回首意
茫然

夜至黃壩驛短歌

氏道森沈十日雨石林冥冥斷行旅洪濤殷地四
山動百折盤渦噤難語前有蝮蛇後豺虎紅鶴哀
號奮毛羽吾生胡為狎此曹命輕如毛爭一縷妻
孥飄泊寄京國欲歸不歸在何所鄉關回首四千
里縱有苦辛誰告汝

百牢關懷家兄子底禮吉子側

行盡山南路前峰入宕渠殘秋杜陵鴈斜日錦江
魚一別四千里何因頻寄書只思風雪裏燈火共
吾廬

龍背洞

衆山如連鰲突兀上龍背鱗鬣中怒張風雨晝晦
昧出爪作之而神奇始何代亂水趨嘉陵波濤勢
交滙萬壑爭一門雷霆走其內直行四顧
氣什倍夕陽下岷峨天彭光破碎咫尺劍門關益
州此絕塞子陽昔躍馬妖夢成佶儼區區王與孟
泥首終一概李特亦雄兒僭竊竟何在

朝天峽

朝登嘉陵舟日出羌水赤履險倦鞍馬即次亦稱
適黥黥雙峽來突見巨靈跼嶄巖無寸膚青冥厲
雙翻陰崖積龍蛻跳波畏鯨擲往往壓人頂駭此
欲崩石洞穴峽半開兵氣尚狼籍蛇豕據成都置
戍當險阨至今三十年白骨滿梓益流民近稍歸
天意厭兵革會見賓廬人燒畬開确礮慷慨一扣
舷浩歌感今昔風便黎州城茫茫波濤白

廣元縣作

樹樹皆猿狖山山盡薜蘿算錢灘下水不及客愁

多

廣元舟中聞棹歌

江上渝歌幾處聞孤舟日暮雨紛紛
歌聲漸過鳥奴去九十九峰多白雲

昭化縣

亂山圍一縣哀柝下初更近郭雙江合
扁舟萬里情浪翻寒月影風急夜潮聲
何限人間事茫茫恨未平

桔柏江

小舟飛青鷁西掠馬鳴閣閣道凌天
關稍幸息腰脚茫茫雙江來抱此益昌郭
荒城豺虎多殘堞出叢薄國憶苴侯開
江疑鼈靈鑿武都地勢高衆水競流落
分道下氐羌兩川乃磅礴鳴水迴驚瀾
陰平劃大壑仇鳩勢未彛犀牛道彌惡
千里會葭萌崩騰似相索漭漭竟同流
西逝連井絡九十九峰閒迴首一錯愕

昭化夜泊

浙浙風欺枕明明月入船三巴空有淚
獨夜不成眠流宕魚鳧國淒其鴻雁天
故園梅信早歸去逼殘年

虎跳驛

路逗蒼溪縣荒涼破驛存
漉金稀見艇畏虎早關
門水合南江壯山連大劍
昏巴西兵馬後多少未
招魂

夜泊雙漩子聞笛

嘉陵江上泊舟時
戍鼓初停月上遲
已聽寒潮不成寐
誰家橫笛怨龜茲

蒼溪縣

萬里行難到
三秋鴈不過
蠻江吹積雨
急峽束盤渦
綿谷青山遠
賓人白弩多
泛舟思杜老
漂泊意如何

閬中縣二首

見說閬中好
軒牕臨錦屏
山川無髣髴
耆舊况凋零
殘壘浮兵氣
寒江滯使星
忽聞羌笛起
風雨晝冥冥

滕王何寂寞
江抱玉臺偏
沙岸收賓馬
湍流激磴船
五城虛夢到
三戶有人煙
不奈驚搖落
魂銷帝子前

閬中感興四首

行役忽永久
衣裳白露淒
秋風吹劒外
客鬢老巴

西螢火飛還沒寒蟬咽復啼不堪蜀道雨山霧書
常迷

巴樹小搖落薄寒初中人江山紛暮節風露感蕭
晨遠使非邛杖思歸閱角巾流波三峽外何處覓
文鱗

西漢茫茫去來過碧玉樓九迴腸已斷三折水還
流涕淚聞鶻鳥雲山繞劔州老親穿望眼霜雪白
盈頭

蜀雨連秦棧秋陰暮復朝山盤黃鶻急江合紫羌
遙烏鵲知何意鼃鼃爾獨驕蓬萊不可到迴首向

風颭

藥物

藥物知何益愁多老病侵眼枯兒女淚心折短長
吟鄉信何時達秋濤日夜深巴猿殊造次悽絕叫
楓林

望劔州懷喬文衣

名鉢內邱名士以湖
口今遷守劔州卒官

次公狂自好名字滿人間才士無高位吟魂寄百
蠻音書湖口縣生死劔門關太息青蠅弔交州幾
歲還

寄綿州守

西南芳草路幾驛到綿州蜀道風雲外涪江日夜
流丹青楚公壁城郭越王樓故里康浪水何人弄
釣舟

龍山驛雨

閬州城邊雲氣浮龍山驛裏雨聲愁遠遊不唾青
城地絕域空悲白鴈秋巴嶺稀逢人北去渝江長
是水南流蕭條孤館荆榛夕更指千峰入漢州

富村驛雨

陰蟲何太苦戶外即蒼山急柝侵孤枕秋河落百
蠻燈昏山鬼逼雨止蟄龍還一夜彌江水愁人淚

點斑

天馬山雨行

兩炬殘更裏亂山高復低疾風吹白雨折坂下青
泥詰屈穿牛角縱橫印虎蹄廿年餘戰骨何處聽
荒雞

鵝溪

剽水殘山祗益愁梓州荒絕接隆州眼明今日鹽
亭路十里鵝溪碧玉流

鹽亭縣南渡梓潼江

南下孱亭路千峰挾雨秋江潮不送客獨向射洪

流

秋林驛雨

積氛常不徹天地日冥冥俗雜蟾彝種林深虎豹
扃荒村陰峒黑寒夜鬼燐青夢裏夔門路開頭下
洞庭

晴

已厭鹽亭雨初逢廣漢晴斷橋人影出沙路馬蹄
輕鷗鷺三秋擊弓刀萬里行浮雲西北去何處望
神京

涪江

十日巴西雨艱難到梓州晚晴見涪水清絕抱南
樓不見千頭橘空驚萬里秋尚餘登覽興留眼望
牛頭

潼川懷少陵

返景下東津扁舟涪水濱女牆崩積雨郡郭入荒
榛山夕煙花少江流戰伐頻飄零思弟妹嗟爾杜
陵人

艤峽

聞有蘇公泉何處尋遺跡空留艤峽名一片東山
石

潼川夜雨忽夢行臨安道上旁人指示曰此
臨平也覺而有作

荒城無漏夜啼鴉夢向臨平詠藕花忽聽梧桐樓
畔雨鄰江江外是天涯

顏魯公干祿字碑

顏常山曾為梓
州司法參軍

古碣卧蒼苔鬱律蛟龍走正氣不磷淄常令鬼神
守

晴

積霧東川道飄蓬劍外州不愁山險阻轉恨雨淹
留乍豁青天影遙通白帝秋舉頭真見日吹角散

蚩尤

建寧驛

銅山行不到樹木晚蕭蕭水亂無行舸棚危有斷
橋負塗人久病嚙膝馬難騎魂斷南荒裏休吟楚
客招

中江縣

慘淡黃雲暮行人出草萊風濤兩江合斜照亂峰
開秋老飛鳥縣鄉遙戲馬臺郢筒何處是一月罷
啣盃

天柱山

三十三
浪淘集言卷四
朝出元武門雲垂雨忽凍登登天柱山千盤墮瀕
洞崢嶸逾巴閬槎牙過秦鳳陟嶺如累碁下谷如
入甕心俯尻益高足踏目先送敢嗟鳥獸羣稍喜
徒旅衆我有大羽箭麗龜輒命中於菟昂其首飲
羽乃不動道旁松合抱巨可任梁棟惜哉野蔓纏
不蒙匠石用絕頂見岷山青城亦伯仲一氣連諸
蕃三州實西控太平幸無事左髻時入貢念彼松
姚戍坐甲苦飢凍俯臨陸海雄仰視天宇空長嘯
千仞岡出險忽如夢

天柱山絕頂望見岷山作

鞍馬衆峰頭蒼茫萬里收岷山橫塞出灌口接天
流要害三城戍邊防八月秋大荒飛鳥外眼底盡
姚州

天柱山竹

雲津橋畔千竿竹蕪沒荒叢也可憐恰似佳人在
空谷天寒翠袖阿誰邊

連山舖夜雨

自沔至此千餘里山始盡少陵詩
連山東南斷始見千里豁即此

蜀雨常侵夜秋泥不肯晴幾聲街鼓寂四壁草蟲
鳴山遠魂猶怯愁多夢易驚鹿頭關外路明日漢
州城

山中有蟲聲如擊磬甚清越蜀人謂之山子
又有花名龍爪甚豔偶成絕句

稻熟田家雨又風枝枝龍爪出林紅
數聲清磬不知處山子晚啼黃葉中

題漢州驛壁

漢州城郭劫灰前房相西湖有斷煙
更問臉波添幾許昨宵金鴈驛中眠

唐人漢州詩十日醉眠金鴈驛臨岐無限臉波橫

望青城山

雲氣連西域名山作漢標千秋軒帝蹟
每夜岳靈朝玉宇凌丹壑神鸞下碧霄
丈人一招手天路未

應遙

彌牟道中望八陣圖遺址

落日彌牟道霜風百戰場青天迴玉壘
遠樹出華陽陸海三都闊雄圖八陣荒
卧龍虛故蹟駐馬惜降王

新都縣題楊升菴先生故宅

有二村樹尚在

侍臣遷謫後常憶泰陵園詞賦留金齒
生還望玉門交州無士燮南海得虞翻
廢宅西風裏連蜷桂樹存

嘉陵舟中懷李容齋陳說巖葉訥菴程湲溱

魚鼓郵籤水驛船夜隨沙雁宿寒煙江湖寄訊鴉
鸞侶白首情親二十年

閬中懷沈繹堂

段萌關外極天涯長憶西園夜鬪茶萬事輸他前
定在今朝真看閬中花

予近爲繹堂書放翁詩三疊淒涼渭城曲數枝閑澹閬中花不意遂成詩識也

鹽亭懷施愚山

嵩少新詩見典刑昔遊迴首歎晨星雲溪花映冷
冷水却向鹽亭望敬亭

懷汪鈍翁

汝卧蘇臺今幾年敬容殘客罷周旋相思濯錦江

頭望不見東吳萬里船

懷劉公駢

越石清剛本異才譙南獵罷幾啣杯臂間白竹新
寶弩不共山南射虎來

懷曹顧菴

感逝傷離此寸心故人書札重南金竹郎祠下風
吹雨腸斷巴猿一夜吟

懷宋荔裳相次入蜀

宋玉高唐賦早成楚雲遙憶片帆輕知君胸次崢
嶸甚欲共濤頭赤甲平

懷梁曰緝

驄馬歸來吏隱兼長齋唯對水晶鹽他年相見嵩
陽寺更為貧兒下幾籤

帶經堂集卷二十六

